

կեանքը շատ տխուր է և յուզիչ: Նա իր ճակատի քրտինքի, իր հալալ աշխատանքի տէրը չէ: Նա շատ ցաւոտ կողմեր ունի: Այդ հանգամանքը պիտի բացատրել նրանով, որ գաւառում կանգնած են երկու մեծ հակադիր դասակարգեր— հօգօրներ և թոյլեր, ճնշողներ և ճնշւողներ, հարստահարողներ և հարստահարւողներ: Հօգօրները, իշխողները թէև գիւղացիութեան փոքր, ամենաչնչին տոկոսն են կազմում, բայց նրանք իրենց ձեռքում կենտրոնացրել են գիւղերի հարստութիւնը ու քաղաքաքան զօրութիւնը և շնորհիւ իրենց ուժեղ կազմակերպութեան անդադար ճնշում, հարստահարում և կեղեքում են թոյլերին, անզօրներին. նրանք միշտ օգտուում են խեղճ աշխատաւոր գիւղացիների գաշտերով, այգիներով, արտերով, դրանց համարում են իրը իրենց սեփականութիւն, վարում են՝ իբրև ճորտերի և անխնայօրէն անարգում, ստրկացնում ու բիրտ բռունցքով, մտրակով, մահակով հարւածներ տեղում նրանց յոգնած թիկուանքներին: Աւելին: Կալանաւորում, բանտարկում և յաճախ ծեծում են խեղճերին անասունների նման: Խեղճերը գժբախտ հանգամանքների դէմ մաքառելու և նրանց յաղթելու ոյժ չունեն, որովհետև նախ՝ անտէր են, երկրորդ՝ համախմբւելու, կազմակերպւելու, բողոքելու և իրենց պահանջները ներկայացնելու տեսակէտից նրանք ամենաաննպաստ պայմանների մէջ են դրւած: Բռնակալ իշխողները, նրանց ամեն մի քայլին, ամեն մի շարժումին, նրանց գործունէութեան վրայ աշտուրջ հսկում և ամեն ինչ խեղղում են իրենց սաղմին մէջ: Թաւալ է գլխաւոր պատճառը սիրելիս, որ չկայ նրանց մէջ դասակարգային կազմակերպութիւն, որ եղբայրօրէն ձեռք մեկնէին միմեանց և համերաշխ կերպով պաշտպանէին իրենց իրաւունքներն ու շահերն անխիղճ հարստահարողներից, հետևապէս նրանք անդադար վճարում են, կաշառում, հիւրասիրում, քծնում և լուռ ու մուռջ քարշ են տալիս իրենց կեանքը հառաչելով, տնքալով և իրենց վիշտն ու ցաւը աչցունքով քամում: